

**Uunga siunnersuut: Inatsisartunut immikkut ittumik qinersineq pillugu Inatsisartut
inatsisaat nr. xx. xx.xx 2021-meersoq**

pillugu

Inatsisinut Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Inatsisinut Ataatsimiititaliap suliarinninnermini ilaasortarai:

Inatsisartunut ilaasortaq Aleqa Hammond, Nunatta Qitornai, siulittaasuugallartoq
Inatsisartunut ilaasortaq Jens Danielsen, ataatsimiititaliamut sinniisoq, Siumut,
Inatsisartunut ilaasortaq Sofia Geisler, ataatsimiititaliamut sinniisoq, Inuit Ataqatigiit
Inatsisartunut ilaasortaq Anna Wangenheim, ataatsimiititaliamut sinniisoq, Demokraatit
Inatsisartunut ilaasortaq Mikivsuk Thomassen, ataatsimiititaliamut sinniisoq, Inuit Ataqatigiit

1. Siunnersuut pillugu

Siunnersuutip kingunerissavaa ulloq 6. april 2021-mi Inatsisartunut immikkut ittumik qinersisoqarnissaa.

Tassunga atatillugu siunnersuutip kingunerissavaa immikkut ittumik qinersinissamut aningaasanik immikkoortitsisoqarnera aammalu partiit qineqqusaarnissaannut tapiissutinik immikkoortitsisoqarnera.

2. Allannguutissatut siunnersuut

Naalackersuisut allannguutissatut siunnersuummik ilaatigut Coronamut tunngasumik iliuutsinut, tassungalu ilanngullugu ikiorsiissutinut, ilaatigullu sanaartugassat pillugit neqeroortitsinermut isumaqatigiissutillu isumaqatigiissutigineqarnissaannut tunngasumik saqqummiussipput.

Allannguutissatut siunnersuut Inatsisartut Naalakkersuisullu inatsisaanni § 29 naapertorlugu isigineqassaaq. Aalajangersakkami tassani aalajangersarneqarpoq nutaamik qinersinissap nalunaarutigineqarnerani, Naalakkersuisut nutaat qinerneqarnissaasa tungaanut, Naalakkersuisut atuukkallassasut, piffissamili tassani Naalakkersuisut ”atorfimmi suliaasat ingerlaannarnissaannut pisariaqartunik taamaallaat suliaqarsinnaapput.”

Coronamut atatillugu iliuutsinut, tassungalu ilanngullugu ikiorsiissutinut aammalu sanaartornermut suliaasqarfimmi iliuutsinut tunngatillugu Naalakkersuisuugallartut iliuuseqarsinnaanermut periarfissaat allannguutissatut siunnersuutikkut annikilliseriartheqqinneqarput.

Taamaalillutillu Naalakkersuisut allannguutissatut siunnersuut naapertorlugu corona pillugu nalunaarutininik aatsaat aalajangersaasinnaapput partigruppini siulittaasut, Inatsisartunut ilaasortaatitat minnerpaamik 2/3-iinik tunuliaquteqartut akuersippata¹.

Kiisalu Naalakkersuisut coronamut atatillugu inuussutissarsiortunut ikiorsiissutinik aatsaat aallartitsillutillu sivitsuisinnaapput partigruppini siulittaasut, Inatsisartunut ilaasortaatitat minnerpaamik 2/3-iinik tunuliaquteqartut akuersippata.

Taamatut annertunerusumik killiliineq iliuutsit pineqartut qineqqusaanermut akornutaasinnaanerisa imaluunniit partiit ilaasa allanut sanilliullutik iluaqutissinneqarsinnaanerisa pinngitsoortinneqarnissaanik siunertaqarpoq.

Kiisalu partigruppini siulittaasut, Inatsisartunut ilaasortaatitat minnerpaamik 2/3-iinik tunuliaquteqartut aatsaat akuersippata sanaartugassat pillugit neqeroortitsinissamut isumaqatigiissuteqarfiginninnissamullu Naalakkersuisuugallartut ingerlatsisinnaapput aatsaallu kinguartitsinissaq aningaasanik annaasaqarnikkut, suliffissaaleqinerup annertuseriarneratigit imaluunniit sanaartugassatut pilersaarutip kinguartoorneratigit inuiaqatigiinnut ajoqutaasumik kinguneqassappat.

Tamatumani ilanngullugu tunngavissaatinneqarpoq sanaartugassat sanaartornissamut pilersaarusernerat naammassereersimanissaat aammalu 2021-mut aningaasanut inatsimmi aningaasaliissutit pisariaqartut immikkoortitsivigineqareersimanissaat.

Allannguutissatut siunnersuummut nassuiaatini erseqqissarneqarpoq sanaartugassat annertunerusut, tunngaviusumik pingaaruteqartut imaluunniit politikkikkut assortuussutaasut qinersinerup nalaani ingerlanneqarsinnaassanngitsut.

¹ Nappaatit tunillaassortut akiorniarlugit iliuutsit pillugit Inatsisartut peqqussutaat malillugu nalunaarutit aalajangersakkat.

3. Aningaasaqarnermut Ataatsimiititaliap tusarniarnera

Inatsisissatut siunnersuut aammalu allannguutissatut siunnersuutitut saqqummiunneqartoq pillugit Aningaasaqarnermut Ataatsimiititaliaq Inatsisinut Ataatsimiititaliamit ataatsimeeqatigineqarpoq. Aningaasaqarnermut Ataatsimiititaliamut ilaasortat isummersuutaat tamanna pillugu Inatsisinut Ataatsimiititaliap isumaliutigisaanut ilanngunneqarput.

4. Inatsisinut Ataatsimiititaliap isumaliutigisai

Ilaatigut Aningaasaqarnermut Ataatsimiititaliap ataatsimeeqatigineqarnera tunngavigalugu Inatsisartunut immikkut ittumik qinersineq pillugu Inatsisartut inatsisaanni piginnaatitsissummik allamik ilanngussinissaq Inatsisinut Ataatsimiititaliamit naapertuussorineqarpoq, taanna malillugu pisariaqartumik aningaasaliissuteqartoqarsimatillugu partigruppini siulittaasut, Inatsisartunut ilaasortaatitat minnerpaamik 2/3-iinik tunuliaquteqartut akuersinerisigut inuiaqatigiinnut pingaaruteqartunik aammalu kinguartinneqassappata inuiaqatigiinnut ajoqutaasinnaasunik allanik Naalakkersuisut aalajangiisinnaapput.

Tamanna naapertorlugu Naalakkersuisut allannguutissatut siunnersuutaannut allannguutissatut siunnersuummik Inatsisinut Ataatsimiititaliaq saqqummiussivoq.

Allannguutissatut siunnersuummut allannguutissatut siunnersuut taanna pillugu Aningaasaqarnermut Ataatsimiititaliaq ilisimatinneqarpoq aammalu isumaqataalluni.

5. Inatsisinut Ataatsimiititaliap inassuteqaataa

Inatsisinut Ataatsimiititaliaq isumaqatigiittoq Naalakkersuisut allannguutissatut siunnersuutaannut allannguutissatut siunnersuummik saqqummiussivoq.

Taama oqaaseqarluni Inatsisinut Ataatsimiititaliap siunnersuut aappassaaniigassanngortippaa.



Aleqa Hammond
siulittaasuugallartoq
Nunatta Qitornai




Jens Danielsen
Siumut



Sofia Geisler
Inuit Ataqatigiit



Mikivuk Thomassen
Inuit Ataqatigiit



Anna Wangenheim
Demokraatit

**Uunga siunnersuut: Inatsisartunut immikkut ittumik qinersineq pillugu Inatsisartut
inatsisaat nr. xx. xx.xx 2021-meersoq**

pillugu

Naalakkersuisut allannguutissatut siunnersuutaannut allannguutissatut siunnersuut

Aappassaaneerinninnissamut Inatsisinut Ataatsimiititaliamit saqqummiunneqartoq

Pragraffi nutaaq

1. § 2-p kingorna ilanngunneqassaaq:

” § 03. Inatsisartut Naalakkersuisullu pillugit Inatsisartut inatsisaanni § 29-mi killiliussat iluanni Naalakkersuisut piginnaatinneqarput, pisariaqartumik aningaasaliissuteqartoqarsimatillugu partigruppini siulittaasut, Inatsisartunut ilaasortaatitat minnerpaamik 2/3-iinik tunuliaquteqartut akuersinerisigut, inuiaqatigiinnut pingaaruteqartunik aammalu kinguartinneqassappata inuiaqatigiinnut ajoqutaasinnaasunik allanik aalajangiinissamut.”

Allannguutissatut siunnersuummut allannguutissatut siunnersuummut nassuiaatit

Piginnaatitsissutitut aalajangersakkat inatsisissatut siunnersuummut ilanngunneqartussat Naalakkersuisunit siunnersuutigineqartut piginnaatitsissummik allamik (coronamut- aamma sanaartornermut suliassaqarfiit avataatigut), inuiaqatigiinnut pingaaruteqartunik aammalu kinguartinneqassappata inuiaqatigiinnut ajoqutaasinnaasunik aalajangiinissanut nalinginnaasumik atorneqarsinnaasumik, ilaneqartariaqartut Inatsisinut Ataatsimiititaliaq isumaqarpoq.